

CAPUT IX.

Ob die Mineralia, oder kleinere Metallen /
als Antimonium, Arsenicum, Auripigmen-
tum, Koboltum, Zincum, Sulphur, vnd
dergleichen / auch zu Metallen werden /
vnd was für Metallen sie geben?

Unter den Chymicis ist ein lange Zeit hero viel
disputirens gewesen / ob diese vorgesezte Mine-
ralien auch auß denselben principiis, davon die Me-
tallen generirt / ihren Ursprung haben / vnd auch
vnter die Metallische Geschlechter mögen gezehlet
werden / darinn sie dann auff den heutigen Tag
noch nit einig seyn / weils der eine solches darfür
hält vnd annimpt / der ander dargegen verwirfft /
also / daß ein junger angehender Liebhaber der Chy-
mia nicht wissen kan / welchem Hauffen er beyfal-
len soll.

Weil aber solche Erkändnuß vnd Wissenschaft
nicht wenig zur Verbesserung der Metallen dienet /
so hab ich nicht vnterlassen können / meine Mey-
nung / welche auff die Experiens gegründet / allhier
zu entdecken / vnd hoffe vielen auß dem Traum da-
mit zu helffen. Diejenige die darfür halten / daß
solche Mineralien auß einem andern Grund her-
kommen / als die Metallen / ist zu verwundern / auß
was schlechtem Fundament sie solches behaupten
wollen ; in deme sie sagen / hätten Metallen dar-
auß sollen werden / warumb ist es dann nicht ge-
schehen /